



JAZZLAFEST

Tur locual bo kier sa di Aruba Jazz & Latin Music Festival
Pa: *Mirurgia Marchena*

ROBERT JEANDOR UN MUSICO CU ARUBA MESTER TA ORGUYOSO DI DJE

ORANJESTAD (APA)

Manera ta conosi e merengüero y tumbero Arubano, Robert Jeandor, tabata un di e artistanan invita den "Aruba All Stars Band" pa nos festival di Jazz y Musica Latino.

Robert Jeandor ta e prome Arubiano cu a bisa Madison Squarre Garden na Merca, Viña Del Mar na Chile, Coliseo Roberto Clemente na Puerto Rico, Poliedro na Venezuela, Carnagy Hall na New York, Tamiami na Miami y Altos De Chavón na Santo Domingo.

Jazzlafest a combersa cu Robert Jeandor encuanto di e festival di e aña aki. Manera ta conosi tabata tin critica cu "Aruba All Stars Band" no a train suficiente pa e festival. Apesar di esaki, nos tin di bisa cu nan a zona hopi bon.

Sinembargo, Jazzlafest a puntra Sr. Robert Jeandor con e ta haña e criticanan aki como un musico profesional. E la bisa cu den e sentido ey e critica ta hopi bon. Pero tambe e la trese dilanti cu e "Aruba All Star Band" a confronta cierto problemanan prom cu e la ser forma manera cu nan a presenta na e festival e aña aki. Tabata tin hendenan cu a bisa cu nan ta bin despues nan no a bin mas, otronan mester bin train y no tabata hasie cual a pone cu trainingnan a bai un poco fastioso pa e banda.

Robert a bisa cu apesar di tur e contratiemponan, nan a traha hunto y duro. E la bisa cu nan a keda contento cu nan a haña criticanan constructivo, hopi hende a keda masha contento cu nan actuacion y sigur e director di orquesta, Lucio Rivadeneira, a hasi un hopi bon trabao.

Disciplina tabata un di e topiconan cu Jazzlafest a toca cu Robert Jeandor. E la bisa cu e no sa kiko ta pasando cu e musiconan na Aruba. "Mi ta kere cu door cu e lugar aki ta asina dushi. Na e lugar aki hende no ta pasa hamber ainda y tur cos ta bin asina facil na Arubianonan," Robert a bisa. E la trese dilanti cu e musiconan ta traha, gana bon placa, pero no ta worry pa tiné como trabao. "Ami tiné como trabao," e la bisa. Robert a bisa cu hopi musico tin tocamento como dobbel job, cual sigur por ser hasi. Pero nan mester pone nan mes disponibel pa siña musica

manera mester ta.

E la trese dilanti e controversia cu tur ora tin critica cu ta busca musiconan di afor. Pero Aruba no tin suficiente musico califica pa e demanda grandi cu tin pa companamiento showman den hotel. Robert a bisa cu e musiconan local cu por hasié, ta nan mester pone di nan parti pa bai dilanti. Esnan cu ta duna les di musica, mester pone preshon ariba nan alumnonan pa nan siña liher, segun Robert Jeandor.

Robert Jeandor tambe ta di opinion, mescos cu Jazzlafest, cu mas bandanan local mester ser incorpora den nos festival di jazz y musica latino. "Un cos si mi ta bisa, e musiconan, e bandanan mester ta prepara manera mester ta," Robert a bisa. E la bisa cu e ta dispuesto pa yuda y coopera den e mundo di musica aki na Aruba, pero areglonan concreto mester ser hasi pa su persona. Jazzlafest ta kere cu sigur un artista local, pero ya di un talla internacional, merece pa su pueblo duné su lugar y reconocimiento como tal.

Robert Jeandor ta kere cu nos musica cultural mester ser tresi dilanti den nos festival. Robert ta kere cu por modifica nos propio musica cultural den un forma mas jazzy ó latino, pero no ta kere ta corecto pa existi nos hendenan toca full jazz.

E la hasi un apelacion pa sigui cu e All Star. E la bisa cu si nos kier pa e All star ta perfecto, ta bon pa nos musiconan cu a studia afor forma parti di esaki. E la bisa cu tur e musiconan profesional mester trata di bin hunto y traha hunto henter aña y train. Tur esaki pa e aña siguiente nos musiconan hasi un influencia grandi, cu nan por haña invitacion pa bai afor tambe den otro festivalnan, ya cu esey mester ta e meta.

Relaciona cu e clinica musical cu a ser organisa, Robert a bisa cu mester pone preshon ariba nos musiconan. E la haña cu no tabata tin hopi musico cu a asisti na e clinica. E la trese dilanti cu lo ta bon pa gobierno inclui musica den su programa. E la bisa cu a bira tempo pa music bira un

proyecto di ley. "Nos mester cambia e sistema na Aruba, musiconan ta mucho comodo y no ta worry mucho," e la bisa.

Robert a bisa cu mester pone e sistema di un forma cu tur musico mester tin su carnet pa e por subi un stage toca. E mester sa musica pa por toca. Si bo sa musica for di bo cabez so, no ta suficiente, pero mester obliga

tur musico pa bai siña lesa musica. Esaki mester ser controla, y si bo no ta studia musica bo no por toca pa publico. Mester bin cu e metodo pa laga e hendenan pasa un test pa wak si bo ta un musico califica. Esaki ta un di e formanan pa nos musiconan local bai dilanti. E la trese dilanti cu tin un scarsedad di trombonista, saxophonista y trompetista.

Hopi aña ta pasa y no ta sali hopi hoben for di school di musica cu por domina e instrumentonan aki.

Robert Jeandor a bisa cu ta duel é pa bisa e cosnan aki, pero mester hasié. Mester pone studiamiento di musica algo obligatorio pa musiconan local. Si no hasi esaki, mester busca musiconan di afor y ora esaki tuma lugar, kier critica tambe.